

四庫全書

子部

欽定四庫全書

子部

武編後集卷四

詳校官中書臣丁榮祚

編修臣倉聖脈覆勘

總校官知縣臣楊懋珩

校對官中書臣牛稔文

謄錄監生臣范廷驛

欽定四庫全書

武編後集卷四

明 唐順之 撰

佯北

戰國秦師伐趙趙奢之子括代廉頗將拒秦於長平秦
陰使白起為上將軍趙括出兵攻秦軍秦軍佯敗而走
張二奇兵以劫之趙軍逐勝追造秦壁堅不得入而秦
奇兵二萬五千人絕趙軍後又一軍五千騎絕趙壁間

趙軍分而為二糧道絕而秦出輕兵擊之趙戰不利因築壁堅守以待救秦王聞趙食道絕自之河內發卒遮絕救兵趙卒食絕四十六日陰相殺括與銳卒自搏戰秦軍射殺之趙軍大敗坑卒四十餘萬

東魏侯景叛高澄歸梁圍彭城澄遣慕容紹宗討之將戰紹宗以梁人剽悍恐其衆不能支一一引諸將而誑之曰我當佯退誘吾兒使前汝可擊其背申明戒之初景又戒梁人曰逐出不過二里會戰紹宗實敗走梁人

不用景言乘勝深入魏人以紹宗之言爲信掩擊遂大敗之

隋薛世雄爲右翊衛將軍竇建德僭稱長樂王遣世雄率兵三萬討之至河間城南營於七里井建德聞世雄至精兵數千人伏河間南界澤中悉拔諸城僞遁去入豆子航中世雄以爲建德果亡乃不設備建德覘知之自率敢死二千人襲擊世雄會雲霧晝晦而兩軍不辨隋軍大潰自相騰藉死者萬餘世雄以數百騎而遁

隋末高祖起兵自太原至霍邑隋將宋老生守城太宗以數騎詣其城下舉鞭指麾若將圍城者老生怒開門出兵高祖因謂隴西公建成曰汝看兩陣將交引左軍直趨東門命太宗引右軍直趨南門以斷其歸路老生之軍背城而列陣高祖以中軍與建成合陣於城東太宗陣於城南老生麾兵疾進先薄高祖而建成墜馬老生乘之中軍與左軍咸却太宗自南原遙見塵起知義師退率二百騎馳下峻坂殺一賊將遂衝斷其軍出其

陣後表裏齊譟隋師大潰遂擒老生而平霍邑

唐姜寶誼武德初爲右武衛將軍時劉武周將黃子英往來雀鼠谷高祖令寶誼擊之子英數以輕兵挑戰寶誼兵纔接子英輕遁如此者再三寶誼悉兵逐之伏兵發軍遂大敗寶誼爲賊所擒

郭子儀討安慶緒渡河圍衛州慶緒率衆來援分三軍子儀陣以待之預選善射者三千人伏於壁內誡之曰候吾小却賊必爭進則登城鼓譟弓弩齊發以逼之既

戰子儀僞退賊果乘之乃開壘門遂聞鼓譟弓弩齊發矢注如雨賊徒震駭因整衆追之賊衆大敗

春秋時齊師伐魯公將戰曹劌請從公與之乘戰于長勺公將鼓之劌曰未可齊人三鼓劌曰可矣齊師敗績公將馳之劌曰未可下視其轍登軾而望之曰可矣遂逐齊師既克公問其故對曰大國難測也懼有伏焉吾視其轍亂其旗靡故逐之

闕圍

後漢初張步據齊地漢將耿弇總兵討之步使其大將費邑軍歷下又分守祝阿鍾城弇先擊祝阿自旦攻城未日中而拔之故開圍一角令其衆得奔歸鍾城鍾城人聞祝阿已潰大恐懼遂空壁亡去

建武中妖賊单臣等相聚入原武劫掠吏民自稱將軍臧宮將數千人圍之賊食多數攻不下士卒死傷帝召公卿諸侯問方畧明帝時爲東海王對曰妖巫相劫勢無久立其中必有悔欲亡者但外圍急不得出耳小緩

之令得逃亡則一亭長足以擒矣帝然之即勅令撤圍
緩守賊衆分散遂拔原武斬单臣等

後漢末將軍朱雋與荊州刺史徐璆共討黃巾擊賊帥趙弘
斬之餘賊韓忠據宛乞降不許司馬張超請聽之雋曰兵有
形同而勢異者昔秦項之際人無定主故賞降附以勸來耳
今海內一統唯黃巾造寇納降無以勸善討之足以懲惡今
若受之更開逆意賊利則進戰鈍則乞降縱敵長寇非良計
也因急攻之連戰不尅雋登山視之顧謂張超曰吾

知之矣賊今外圍周固內營迫急乞降不受欲出不得所以死戰也萬人一心猶不可當況十萬乎其害甚矣今不如撤圍并兵入城忠見圍解勢必自出出則意散易破之道也既而解圍忠果出戰雋因擊大破之忠等並降

韓世忠時勝捷軍張師正敗宣撫司使李彌大斬之大校李復鼓衆以亂淄青之附者合數萬人山東復擾彌大檄世忠將所部追擊至臨淄河兵不滿千分爲四隊

布鐵蒺藜自塞歸路令曰進則勝退則死走者命後隊
勦殺於是莫敢返顧皆死戰大破之斬復餘黨奔潰乘
勝逐北追至宿遷賊尚萬人方擁子女椎牛縱酒世忠
單騎夜造其營呼曰大軍至矣亟束戈卷甲吾能保全
汝功名賊駭慄請命因跪進牛酒下馬解鞍飲啖之盡
於是衆悉就降黎明見世忠軍未至始大悔失色

曹操克袁讓圍壺關下令曰城拔皆坑之連月不下曹
仁言於操曰圍城必示之以活門所以開其生路也今

公告之必死將人自爲守且城固而糧多攻之則士卒傷守之則引日久今頓兵堅城之下攻必死之虜非良計也太祖從之城遂降

後魏末高歡起義兵於河北爾朱兆等諸將同會鄴南士馬精強號二十萬圍歡於韓陵山是時歡馬二千步卒不滿三萬人兆等設圍不合歡爲圓陣連繫牛馬盧自塞之於是將士死戰四面奮擊大破兆等

窮寇

漢趙充國討先零羗羗久屯聚解弛忽覩大軍棄輜重
欲渡湟水道阨狹充國徐行驅之或曰逐利行遲充國
曰窮寇也不可迫緩之則走不顧急之則還致死諸將
皆曰善虜衆果赴水溺死者百數於是大破賊衆

後涼呂光遣二子紹纂伐段業南涼禿髮烏孤遣其將
楊軌救業紹以業等軍盛欲從三門關挾山而東纂曰
挾山示弱取敗之道不如結陣衝之彼必憚我而不戰
也紹乃引軍而南業將擊之其將沮渠蒙遜諫曰楊軌

恃虜騎之強有窺伺之心紹纂兵在死地必決戰求生
不戰則有太山之安戰則有累卵之危業曰卿言是也
乃按甲兵不戰紹亦難之各引兵歸

高齊北豫州刺史馬消難請降於周周遣楊忠達奚武
等率騎士五千迎之從間道馳入齊境五百里前後三
遣使報消難皆不返去虎牢三十里武疑有變欲還忠
曰有進死無退生獨以千騎夜趣城下城四面峭絕但
聞擊柝聲武親來麾數百騎西去忠勒餘騎不動侯門

開而入馳遣召武齊鎮城將伏敬遠勒甲士三千人據東埤舉烽嚴警武憚之不欲保城乃多取財帛以餌消難及其屬先歸忠以三千騎爲殿到洛陽皆解鞍而卧齊衆來追至洛北忠謂將士曰但飽食今在死地賊必不敢渡水當吾鋒食畢齊師闕若渡水忠馳騎將擊之齊兵不敢逼遂徐引而還

狄青嘗與虜戰大勝追奔數里虜忽壅遏山隅知其前必遇險士卒皆欲奮戰青遽鳴鉦止之虜得引去驗其

處果臨深澗將佐悔不擊青獨曰不然奔命之虜忽止而拒我安知非謀軍已大勝殘寇不足利得之無所加重萬一落其術中存亡不可知寧悔不擊不可悔不止

歸師

劉項爭天下之際漢王至南鄭諸將及士卒皆歌思東歸韓信說漢王曰項王王諸將之有功者而王獨居南鄭是遷也軍吏士卒皆山東之人也日夜跂而望歸及其鋒而用之可以有大功天下已定民皆自寧不可復

用

曹操圍張繡於穰劉表遣兵救繡以絕軍後操將引還繡兵來追操軍不得進連營稍前到安衆繡與表兵合守險操軍前後受敵操乃夜鑿險爲地道悉過輜重設奇兵會明賊謂操爲遁也悉軍來追乃縱奇兵步騎夾攻大破之操謂荀彧曰虜逼吾歸師與吾死地戰是以知勝

宋建武初魏圍鍾離張欣泰爲軍主隨崔慧景救援及

魏軍退而邵陽洲上餘軍萬人求輸馬五百疋假道慧景欲斷路攻之欣泰說慧景曰歸師勿遏古人畏之兵在死地不可輕也慧景乃聽之過

前秦苻堅征晉至壽春兵敗還長安慕容泓起兵於華澤堅命苻叡討之叡勇果輕敵不恤士衆泓聞其至也懼率衆將奔關東叡驅兵邀之姚萇諫曰鮮卑有思歸之心宜驅令出關不可遏也叡弗從戰於華澤叡敗績被殺

夏赫連勃勃伐禿髮傉檀大敗之驅掠二萬餘口牛馬
羊數十萬而還傉檀率衆追之其將焦殷曰勃勃御軍
齊肅未可輕也今因抄掠之資率思歸之士人自爲戰
難與爭鋒不如從溫圍北渡趣萬斛堆阻水結營制其
咽喉百戰百勝之術也傉檀不從勃勃聞而大喜乃於
陽武下峽鑿陵埋車以塞路勒衆逆擊傉檀大敗之殺
傷萬計

後凉呂弘攻段業於張掖不勝將東走業議欲追擊之

其將沮渠蒙遜諫曰歸師勿遏窮寇勿追此兵家之戒
不如縱之以爲後圖業曰一日縱敵悔將無及遂率衆
追之爲弘所敗

截歸

後漢涼州賊王國圍陳倉不拔而去將軍皇甫嵩進兵
擊之董卓曰不可兵法窮寇勿遏歸衆勿追今我追國
是迫歸衆追窮寇也困獸猶鬪蜂蠆有毒况大衆乎嵩
曰不然前吾不擊避其銳也今而擊之待其衰也所擊

疲師非歸衆也國衆且走莫有鬪志以整擊亂非窮寇也遂獨進擊之使卓爲後拒連戰大破之斬首萬餘級國走而死

唐馬燧討田悅軍中乏糧悅深壁不戰燧令諸軍持十日糧進次滏口與悅夾洹水而軍李抱真與李芄問曰糧少而深入何也燧曰糧少利連戰兵法善於致人不致於人今田悅與恒州淄青三鎮爲首尾計欲不戰以老我師若分兵擊其左右悅必救之則我腹背受敵戰

必不利故進軍逼悅所謂攻其所必救也彼苟出戰必爲諸軍破之燧乃造三橋道逾洹水自挑戰悅不敢出恒州兵以軍少懼爲燧所并乃引軍合於悅悅謂燧明日復挑戰乃伏兵萬人欲邀燧燧乃令諸軍半夜皆食先鷄鳴時擊鼓吹角潛傍洹水徑趨魏州令曰聞賊至則止爲陣又令百騎鳴鼓吹角皆留於後仍抱薪舉火待軍畢發止角匿其旁伺悅畢渡焚其橋軍行十數里悅乃率淄青恒州步騎四萬人踰橋掩其後乘風縱火

鼓譟而退燧乃坐甲令無動命前除草斬荆棘廣百步以爲陣燧出陣募勇士得五千餘人分爲前部以俟賊至比悅軍至則火止力少衰乃縱軍擊之悅軍大敗悅走橋橋已焚悅軍亂赴水斬首一萬

前漢高帝匈奴圍於平城七日高帝使使問厚遺闕氏乃開圍一角於是高帝令士皆持滿傳矢外嚮從解角直出得與大軍合冒頓引兵去

後周大將宇文護伐齊遣將尉遲迴圍洛陽爲敵所敗

周將達奚武與齊王憲於邛山禦之至夜收軍憲欲待
明更戰武欲還固爭未決武曰洛陽軍散人情駭動若
不因夜速還明日欲歸不得武在軍旅久矣備見形勢
大王年少未經軍事豈可將數營士衆一朝棄之乎憲
遂從之全軍而返齊人弗悟而不追若追之必克也

宋太宗時契丹與西賊相結窺邊上密授成算於府州
折御卿使爲之備至是敵將韓德威萬餘衆誘黨項勒
浪等族自振武入寇御卿大敗之於河义勒浪等族乘

敵之亂詐爲府州兵躡其後敵衆死者十六七奏至上
召其使問狀因笑謂左右曰北部小醜輕進易退常戒邊
將勿與爭鋒待其深入即分奇兵斷其歸路從而擊之
必無遺類果如我言左右呼萬歲因遣內侍往圖地形
觀之其勒浪等族既與敵有隙悉款塞內附

五代黃文靖佐葛從周闢 入潞會晉軍十餘萬俯外
垣砦文靖慮孤軍難守乃與從周啓闔出師文靖爲殿
後命矢刃皆外向持重而還晉人不敢逼

魏傳永爲豫州刺史南齊將裴叔業來侵楚王戍永令
填塞外塹夜伏戰士一千人於城外及曉而叔業等至
頓於城東列陣將置長圍永所伏兵於道左擊其後軍
破之叔業乃令將佐守所列之陣自率精甲數千人救
之永上門樓觀叔業南行五六里許便開門奮擊遂摧
破之叔業奔走左右欲追永曰弱卒不滿三千彼精甲
猶盛非力屈而敗直墮吾計中耳既不測我之虛實足
喪其膽俘此足矣何暇追之

疑

後漢廉范爲雲中太守會匈奴大入塞范自率士卒拒之虜衆盛不敵會日暮令士各交縛兩炬三頭然火虜遙見火多謂漢救兵至待朝將退范令軍中蓐食晨往擊之斬首數百級虜自此不敢向雲中

陳登守廣陵孫策遣軍攻登於康琦城登使人求救於曹公而密去城十里軍營處所多取柴薪兩束一聚相去十步縱橫成行令俱起火互然其聚城中稱慶若大

軍到賊覩光驚潰登勒兵追奔斬首萬級

秦苻堅陷襄陽晉將桓冲攻之堅將慕容垂等率兵步騎五萬攻襄陽以石越爲前鋒次於沔水垂越夜命三軍人持十炬火繫炬於木枝光照數十里冲懼退還上明

宋晉安王子勛舉兵反潯陽遣臨川內史張淹自鄱陽嶠道入三吳明帝命將討之時朝廷器甲悉充南討故軍容寡闕乃編椶皮爲馬具折竹爲寄生夜舉火進軍賊望見恐懼未戰而走

欽定四庫全書

武編後集
卷四

十四

後魏雍州刺史蕭寶寅據州反魏大將長孫稚討之軍次弘農副將楊侃曰昔魏武與韓遂馬超挾關爲壘勝負之理久而未決豈才雄相類莫略抗衡當以河山險阻難用智力今賊守潼關全據形勢縱曹操復出亦無所逞奇必須取蒲坂飛棹西岸置兵死地人有關心潼關之賊必睹風而散諸處既平長安自克稚曰賊黨薛循義已圍河東薛風賢又保安邑雖有此計猶用爲疑侃

曰河東治在蒲坂西帶河渭所部之人多在東境循義

驅率壯勇西圍郡邑父老妻弱尚保舊村若步卒一臨方寸各亂人人思歸則郡圍自解不戰而勝昭然在目稚從之令其子彥等領騎與侃於弘農北度所統悉是騎士習於野戰未可攻城便據石壁侃乃班告曰今且停軍於此以待步卒兼觀人情向背然後行若送降名者各自還村候臺軍舉烽火亦應之以明降款其無應之者即是不降之村理須殄戮賞賚軍士人遂傳相與告報未實降者亦詐舉烽火一夕之間火光遍數百里內寶寅將時圍河東不測所以各自散歸長安賊平侃頗有力

欽定四庫全書

武編後集
卷四

十五

西魏將宇文測行綏州事每歲河水合後突厥即來寇掠先是常先遣居人入城堡以避之測至皆令安堵如舊乃於要路數百處多積柴仍遠斥侯伺其動靜是年十二月突厥從連谷入寇去界數十里測命積柴之處一時縱火突厥謂有大軍至懼而遁走自相蹂踐委棄

雜畜及輜重不可勝數測徐率所部收之分結百姓自是突厥不敢復至

唐永王璘拒命肅宗使中官啖廷宗招討之判官李銑
闕以廣陵步卒三千同出於瓜步洲廣張旗幟耀

乎江津璘登埤望之竟日始有懼色其夕銑令多燒火
人執兩炬以疑之隔江望者兼水中之影一皆爲二璘
軍人以火應之璘懼以爲官軍悉濟矣遂以兒女及麾
下宵遁

春秋時楚子儀之亂析公奔晉晉以爲謀主繞角之役析公曰楚師輕窵易震蕩也若多鼓鈞聲以夜軍之楚師必遁晉人從之楚師宵潰

唐王皎爲朔方副總管吐蕃精甲十萬寇臨洮皎率步兵二千卷甲倍程與臨洮軍合皎出奇兵七百人在蕃後夜襲之去賊五里置鼓角令前者遇賊大呼後者擊鼓賊大懼疑有伏兵自相殺者萬計

晉侯伐齊齊侯登巫山以望晉師晉人使司馬斥山澤

之險雖所不至必旆而疏陳之使乘車者左實右僞以旆先輿曳柴而從之齊侯見之畏其衆也乃脫歸

曹休與孫權兵戰休敗權追兵斷夾石諸將不知所出賈逵曰休敗於外進不能戰退不能還安危之機不及終日賊以軍無後斷故至此今疾進出其不意所謂先人以奪其心賊見吾兵必走乃兼道進軍多設旗鼓爲疑兵賊見遂退

魏將軍曹爽襲蜀蜀將劉敏王平鎮漢中拒之或謂但

可守城不出拒敵敵必自引退敏以爲男女布野餘糧
栖畝若聽之入則大事去矣遂率所領與平據形勢多
張旗幟亘百里會費禕至軍退

東晉末桓玄篡晉劉裕起義兵討之玄使將桓謙屯覆
舟山裕先使羸弱登蔣山多張旗幟以油帔冠諸木杪
遍滿山谷玄不之測大懼裕乃與劉毅等分數隊進突
謙陣皆殊死戰無不以一當百時東北風急毅軍放火
煙塵漲天鼓譟之聲震駭京邑謙軍一時奔散

後魏幽州刺史孫定兒據州不下衆數萬宇文泰令劉亮襲之定兒以義兵猶遠未爲備亮乃將三十騎先置一燧於近城高嶺即馳入城定兒方高會卒見亮至衆皆駭愕亮乃麾兵斬定兒縣首州門號令賊黨仍遙指城外燧命二騎曰出追大軍賊黨恐懼一時降服

隋煬帝爲突厥所圍郡縣皆發兵赴援時唐太宗年未弱冠召募從軍隸屯衛將軍雲定興師將發太宗勸之多齎旗鼓設疑兵以威突厥定興不納太宗謂之曰始

畢掃其境內敢圍天子本疑國家倉卒無援忽見旗鼓之盛必謂救兵雲集今者進師可前後相次數十里間連亘不絕晝則旛旗夜則金鼓相應以張形勢則必見懼望塵而退此計之上也不然爲彼所輕悉軍來戰公必不能支矣定興從焉將次崞縣突厥候騎馳告始畢曰兵大至矣遂解圍而退果如所料

宋開寶中伐金陵王師自荆渚乘戰艦而下以黃州刺史王明領戰艦爲江路巡檢僞將朱令贇自湖口領兵

十五萬連大艦沿流而下將焚采石浮梁直抵金陵爲
援明請益舟師以襲令贇上曰非應急之策也令贇朝
夕至金陵之圍解矣乃密遣人諭明於州浦間多立長
木若帆檣之狀令贇望見果疑我師襲其後逗留不進
移檄諸軍生擒令贇

後魏葛榮舉兵向京師衆號百萬相州刺史李神雋閉
門自守爾朱榮率精騎七千人馬皆有副倍道兼行東
出塗口與葛榮遇衆寡非敵葛榮聞之喜乃令其衆辭

長繩曰至便縛取之自鄴以北列陣數十里翼張而進
榮潛軍山谷爲奇兵分督將以上三人爲一處處有數
百騎令所在揚塵鼓譟使賊不測多少又以人馬逼戰
刀不如棒密勒軍士馬上各齎棒一枚置於馬側至戰
時不聽斬級以棒擊之而已慮廢應援乃分命壯勇所
當衝突榮身自陷陣出于賊後表裏合擊大破之於陣
擒葛榮餘衆悉降

隋楊義臣爲朔州總管煬帝即位漢王諒作亂代州總

管李景爲漢王將喬鍾葵所圍詔義臣救之義臣自以兵少悉取中軍牛驢得數千頭復令兵數百人人持一鼓潛驅之出其不意義臣晡後與鍾葵戰兵初合驅牛驢者疾進一時鳴鼓塵埃漲天鍾葵軍不知所爲伏兵發因而大潰縱擊破之

後漢虞詡爲武都太守討叛羗羗率衆數千遮詡於陳倉峭谷詡停軍不進宣言上書請兵須到乃發羗聞之乃分掠旁縣詡因其兵散日夜進道兼行百餘里令吏

士各作兩竈日增倍之羗不敢逼既到因設伏於淺水掩擊大破之

魏文帝至廣陵吳人大駭乃臨江爲疑城自石頭至於江乘架以木幹衣以葦蓆加采石焉一夕而成魏人自江西望甚憚之遂退軍

吳孫堅少時與父共載船至錢塘會海賊掠取賈人財物方於岸上分之行旅皆住船不敢進堅謂父曰此賊可擊請討之父曰非爾所圖也堅行操刀上岸以手東

西指麾若分部人兵以邏遮賊狀賊望見以爲官兵捕之即委財物散走堅追斬得一級而還

後周齊王憲大舉伐齊憲爲前鋒守雀鼠谷時陳王純屯千里徑宇文椿屯鷄棲原宇文盛守汾水關并受憲節度憲密謂椿曰兵者詭道汝今爲營不須張幕可伐栢爲庵示有處所令兵去之後賊猶致疑時齊主分軍萬人向千里徑又令其衆出汾水關自率大兵與椿對宇文盛馳告急憲自救之齊人遽退盛逐之多有斬獲俄

而椿告齊衆稍逼憲又救之會被勅追還率兵夜返齊人果謂栢庵爲帳幕不疑軍退翌日始悟

阿朮軍還宋兵邀襄樊間阿朮乃自安陽濟江留精騎三千陣牛心嶺復立虛寨設疑兵是夜敵果至斬首萬級戰國魏將田豫率兵追擊鮮卑單將銳卒深入虜庭胡人衆多鈔軍前後斷絕歸路豫乃進軍去虜衆十餘里結屯營多聚牛馬冀然之從他道引去胡見煙火不絕以爲尚在行數十里乃知之

後梁劉鄩圍晉陽將還戒衆曰有病者殺而焚之三軍咸稱不病乃退因選精卒殿後徐而退之至會關留數馬及旌旗虛設於高岡之上晉人疑有伏兵遂不敢追時服其謀

劉鄩拒晉以晉兵盡在魏州晉陽必虛欲以奇計取之乃潛引兵自黃澤西去晉人怪鄩軍數日不出寂無聲迹遣騎覘之無斥候者城中亦無煙火但鳥止於壘上時見旗幟循堞往來晉王曰我聞劉鄩用兵一步百計

必詐也更使覘之乃縛旗於芻偶之上使驢負之循堞而行得城中羸老者詰之云軍去已二日矣既而有人自鄴至者言鄴軍已趣黃澤晉王發騎追之

時江南東道轉運副使曾昇奏訪聞方臘賊徒雖多全少器械惟以人衆爲技本路所遣官兵各持器械而賊徒獨以數百人前後奮拳輒困官兵童子婦人在前飾以丹黛假爲妖怪以驚我師復在巢穴四面設險陰爲陷穽又爲長人服火衣作關機以動止執矛戟旗幟飾以

丹黨爲鬼神之貌以惑官兵皆不足畏必得熟知道路
之人詔劄與童貫譚積自此賊情漸虛官兵始知所向
以至擒殄

開禧用兵諸將皆敗唯畢再遇數有功敵常以水櫃敗
我再遇夜縛藁人數十衣以甲冑持旗幟戈矛儼立成
行昧爽鳴鼓敵人驚視亟放水櫃旋知其非真也甚沮
乃出師攻之敵大敗又嘗引敵與戰且前且却至於數
四視日已晚乃以香料煮黑豆布地上復前搏戰佯爲

敗走敵乘勝追逐其馬已饑聞豈香皆就食鞭之不前
我師反攻之敵人死者不勝計又嘗與敵對壘度敵兵
至者日衆難與爭鋒一夕拔營去慮來相追乃留旗幟
於營并縛生羊置其前二足於鼓上擊鼓有聲敵不覺
其爲空營復相持竟日及覺欲追則已遠矣近時流州
蠻叛荆湖制司遣兵討之蠻以竹爲箭傳以毒藥略着
人肉血濡縷無不立死官兵畏之莫敢前乃祖再遇之
智裝束蒙人羅列焜燿蠻見之以爲官軍萬矢俱發伺

其矢盡乃出兵攻之直擣其穴一戰而平

後趙將石虎領兵救陳川爲祖逖所敗兵掠豫州留將
桃豹守譙城居西臺逖與豹共處一城賊從南門出入
放牧逖軍開東門相守四旬逖以布囊盛土如米狀使
千餘人運上臺又使數人擔米僞爲疲極而息於道賊
果逐之皆棄擔而走賊既獲米謂逖衆豐飽而胡戍饑
久益懼無復膽氣

宋檀道濟都督征討諸將事與魏軍三十餘戰多捷軍

至歷城以資運竭乃還卒有降魏者具說糧食已罄於是士卒憂懼莫有固志道濟夜唱籌量沙以所餘少米散其上及旦魏軍知資糧有餘故不復追以降者爲妄斬以徇時道濟兵寡弱軍中大懼道濟乃命軍士悉去甲身白服乘輿徐出外圍魏軍懼有伏不敢逼乃歸道濟雖不尅定河南全軍而返

漢景帝時匈奴大入上郡天子使中貴人從李廣勸兵擊匈奴貴人將十騎出獵見匈奴三人與戰被射傷中

貴人走廣廣曰必是匈奴射鵰者也廣乃使百騎往馳
三人令其騎張左右翼而廣身射彼三人殺其二人生
得一人果射鵰者也遙見匈奴有數千騎見廣以爲誘
騎驚上山陣廣所從百騎皆大恐欲馳還走廣曰吾去
大軍數十里今若走匈奴追射我立盡若我留匈奴必
以爲大軍之誘必不敢擊我廣令諸將曰前未到匈奴
陣二里所止皆下馬解鞍其騎曰虜多且近即有急奈
何廣曰彼虜以我爲走今皆解鞍示不走用堅其意胡

騎遂不敢擊有白馬將出護其兵於是廣上馬與十餘騎奔射殺之復還其騎中解鞍令士皆縱馬卧是時會暮胡兵終怪之卒不敢擊向夜半時胡兵以爲漢有伏軍於旁皆引兵去詰朝廣乃歸其大軍

曹操軍臨漢中蜀將趙雲將數十騎輕行卒與操大軍遇遂前突其陣且鬪且却操軍追至營雲更大開門偃旗息鼓操軍疑有伏引去

蜀諸葛亮屯陽平遣魏延并兵東下亮惟留萬人守城

魏將司馬懿率二十萬衆拒亮而與魏延軍相錯徑前
六十里偵候白懿說亮城中兵少力弱將士失色亮是時
意氣自若勒軍中皆偃旗赴鼓不得出菴幔開四門掃
地却灑懿疑其有伏於是引軍北趣山亮謂叅佐曰司
馬懿謂吾有疆伏循山走矣候邏還白如亮所言懿後
知深以爲恨

南齊將馮道根守阜陵理城隍遠斥候有如敵將至者
衆頗笑之道根曰怯防勇戰此之謂也理城未畢會魏

將率兵二萬奄至城下道根塹壘未固城中衆少衆皆失色道根命開門緩服登城選精銳二百人出與魏將戰敗之

魏將于謹嘗率輕騎出塞覘候屬鐵勒數千騎奄至謹以衆寡不敵退必不免乃散衆騎使匿從薄間又遣人升山指麾若部分軍衆者鐵勒望見雖疑有伏兵既恃其衆不以為慮乃進軍逼謹謹嘗乘駿馬為紫駒賊先所識乃使二人各乘一馬突陣而出賊以為謹也皆爭

逐之謹乃率餘軍擊追賊遂奔走因得入塞

前涼張重華以謝艾為軍師率騎三萬進軍臨河後趙石季龍將麻秋以三萬衆拒之艾乘輅車冠白帽鳴鼓而行秋望而怒曰艾年少書生冠服如此輕我也命黑稍龍攘三千人馳擊之艾左右大擾或勸艾乘馬艾不從乃下車據胡床指麾處分賊以為有伏發也懼不敢進又遣將緣河截其後秋軍乃退艾乘勝奔擊遂大敗之

西魏宇文泰與東魏高歡戰於印山趙貴為左軍若于
惠為右軍歡兵萃左軍趙貴等戰不利會日暮歡進兵
攻惠惠擊之皆披靡至夜惠引去歡騎復來追之惠徐
下馬顧命厨人營食食訖謂左右曰長安死此中死有
以異乎乃建旗鳴角收敗軍徐還歡追騎憚惠疑有伏
兵不敢逼

唐吐蕃陷瓜州王君奭死河西恟懼以張守珪為瓜州
刺史領餘衆方復築州城賊又暴至畧無守禦之具守

珪曰彼衆我寡又創痍之後不可以矢石相持須以權道制之乃於城上置酒作樂以會將士賊疑城中有備不敢攻城而退守珪總兵擊敗之

宋將雷有終討蜀賊李順進至廣安軍軍壘瀕江三面立柵會夜陰晦賊衆奄至鼓譟舉火士伍恐懼有終安坐櫛髮氣貌自若賊既合圍有終引奇兵出其後擊之賊衆驚擾赴水死者無算

先聲

漢王遣韓信破陳餘後信募致廣武君李左軍師事之
韓信曰僕欲北攻燕東伐齊若何而有功對曰今將軍
涉西河虜魏王豹一舉而下井陘不旬朝破趙二十萬
衆名聞海內威振天下此將軍之所長也然而衆勞卒
罷其實難用今將軍欲舉倦弊之兵頓之燕堅城之下
欲戰恐久力不能拔情見勢屈曠日糧竭而弱燕不服
齊必拒境以自彊燕齊相持而不下劉項之權未有所
分也若此者將軍之所短也臣聞善用兵者不以短擊

長而以長擊短爲將軍計莫如按甲休兵鎮撫其孤百里之內牛酒日至以饗士大夫驛兵北首燕路而後遣辯士奉咫尺之書暴所長於燕燕必不敢不聽從燕已從使者東告齊齊必從風而服雖有智者亦難爲齊計矣如是則天下事可圖也兵固有先聲而後實者此之謂也韓信並從之燕齊從風

魏鄧艾既平蜀言於司馬昭曰兵有先聲後實者今因平蜀以乘吳吳人震恐席卷之時也然大舉之後將士

疲勞不可使用且徐緩之煮鹽興冶爲軍農要用並作舟船然後發使告以利害吳必歸化可不征而定也會艾誅不果行

聲

春秋晉侯伐齊齊侯禦諸平陰塹防門而守之廣里晉將范宣子告齊大夫析文子曰吾知子敢匿情乎魯人莒人皆請以車千乘自其鄉入既許之矣若入君必失國子盍圖之子家以告公公恐晏嬰聞之曰君固無勇

而又聞是弗能久矣齊師夜遁

趙石勒荊州監軍郭敬寇晉襄陽勒驛令敬退屯樊城
戒之使偃藏旗幟寂若無人彼若使人觀察則告之曰
自愛堅守後七八日大軍將至相禁不復得走敬使人
浴馬於津周而復始晝夜不絕偵諜還晉南中郎將周
撫以爲勒大軍至懼而奔於武昌敬遂入襄陽

梁雍州刺史嶽陽王蕭詧雖稱藩於西魏而尚有二心
西魏將楊忠自樊城觀兵於漢濱揚旗進進實騎二千

登樓觀以爲三萬懼而服焉

後唐將李存審初爲都指揮使梁太祖北伐至棗強存審以騎兵三千屯於趙州初梁君聲言五十萬存審以兵少不敵心頗憂之謂裨將趙行實曰但得老賊在東別將西來尚可從容畫策不旬日楊師厚攻棗強賀德倫寇脩縣攻城甚急存審謂趙行實曰吾王方事北面南鄙之事付我等數人今西道無兵脩縣危急我等坐視其弊何以自安老賊既不下脩城必西寇深冀不預

爲方畧則滋蔓難圖與公等輕騎而行觀其所向乃選
精騎八百急趣信都扼下博橋道存審令史建塘李嗣
肱分兵拒守建塘分麾下五百騎爲五軍一軍至衡水
一軍至南宮一軍至信都一軍至阜城自將一軍深入
各命俘賊討芻糧者十人而會於下博橋期曰諸軍所
至遇梁軍之樵芻者數百人皆殺之留數人斲臂縱去
曰爲我語朱公晉王大軍至矣時梁祖引師厚兵就德
倫共攻脩縣始至縣西未及置營嗣肱建塘各領百餘

騎爲賊旗幟服色與芻糧者相雜而行至暮及賀德倫營門殺其門者縱火大呼俘斬而旋其芻蕘者斷臂得歸皆言唐兵大至梁祖大駭遂命夜遁

後漢末劉備遣將吳蘭屯下邳曹公遣曹洪征之備遣張飛屯固山欲斷軍後衆議狐疑洪曰賊實斷道當伏兵潛行今反張虛聲此其不能也宜及其未集縱擊蘭蘭破則飛必走乃集兵擊蘭大破之飛果走

劉裕率兵伐南燕慕容超走廣固且乞師於秦裕築圍

守之秦王姚興遣使告裕曰慕容氏相與鄰好又以窮告急今當遣鐵騎十萬徑據洛陽晉軍若不退者便當長驅而進裕乃呼興使者謂曰語汝姚興我滅燕之後息甲三年當平關洛今能自送便可速來劉穆之後聞興使馳入見裕而秦使已去裕以興所送并答語示穆之穆之尤之曰常日事無大小必同與謀此宜善詳云何率爾便答此語未能威敵適重彼怒耳若燕未可拔興救奄至不審何以待之裕笑曰此是兵機非卿所解

故不語耳夫兵貴神速彼若審能遣救必畏我知寧容
先遣信命此是其見我伐燕內已懷懼自彊之辭耳與
果不出師廣固終拔擒慕容超平齊地

宋雍州刺史袁顗舉兵反汭流入鵲尾與官軍相持既
久軍主張興世越鵲尾上據錢溪顗黨劉胡攻之不下
遣人傳唱錢溪已下官軍並懼沈攸之曰不然若錢溪
實敗萬人中要應有逃亡得還者必是彼戰失利唱空
聲而以惑衆心耳勒軍中不得輒動錢溪捷報尋至果

大破賊攸之悉以錢溪所送胡軍耳鼻示之顛駭懼急
追胡還遂敗之

降

戰國燕軍大破齊國齊將田單守即墨知士卒可用乃
身操板插與士卒分功妻妾編行伍之間盡散飲食饗
士令甲卒皆伏使老弱女子乘城遣約降於燕燕軍皆
呼萬歲田單又收民金得千鎰令即墨富豪遣使遺燕
將書曰即墨即降願無掠虜吾族家妻妾令安堵燕將

大喜許之燕軍由此益懈田單出軍擊大敗之

項羽圍滎陽漢王請和割滎陽以西者爲漢以東者爲
楚亞父勸項王急攻滎陽漢王患之紀信曰事急矣臣
請誑楚可以間出於是陳平夜出女子東門二千餘人
楚因擊之紀信乃乘王車黃屋左纛曰食盡漢王降楚
軍皆呼萬歲之城東觀以故漢王得與數十騎出西門
逃遁

曹操入荊州劉琮降得水軍步兵十萬孫權與操遇於

赤壁部將黃蓋曰今寇衆我寡難與持久觀操方連船
艦首尾相接可燒而走也乃先書報欲降曹軍吏士皆
引頸相望指言蓋放諸船同時發火時風猛煙焰
漲天人馬燒溺死者甚衆

晉將李矩守滎陽城前趙劉聰將劉暢步騎三萬討矩
屯於韓王故壘相去七里遣使招矩時暢卒至矩未暇
爲備遣使奉牛酒詐降於暢潛匿精勇見其老弱暢不
以爲虞大饗染師人皆醉飽矩謀夜襲之暢僅以身免

周魴爲鄱陽太守被命密求山中舊族名帥爲北敵所
聞知者令詭挑魏揚州牧曹休魴答恐民帥小醜不足
仗任事或漏泄不能致休乞遣親人齎牋七條以誘休
且曰今使君若從皖道進住江上魴當從南對羊歷口
爲應未到江岸可住百里土令此間民知北軍在彼即
自善也此間民非苦饑寒而甘兵寇苦於征討樂得北
屬但窮困舉事不時見應尋受其禍耳如使青徐諸軍
首尾相銜牽綴彼兵使不得速退者則善之善也魴生

於江淮長於時事見其便利百舉百捷時不再來敢布
腹心休果信魴帥步騎十萬輜重滿道徑來入皖魴亦
合衆隨陸遜橫截休休幅裂瓦解所獲萬計魴初建密
計時頻有郎奉詔諮問諸事魴乃詣部郡門下因下髮
謝故休聞之不復疑慮事捷振旅帝大會諸將歡飲酒酣
謂魴曰君下髮載義成孤大事君之功名當書之竹帛
加裨將軍賜爵關內侯

後魏崔延伯既破秦賊乃與蕭寶寅率衆會於安定甲

卒十二萬鐵馬八千疋軍威甚盛時万俟卨奴置營涇州西北七里當元城時或輕騎蹙來挑戰大兵未交便爾奔北延伯矜功負勝遂唱議先驅伐木別造大排內爲鎖柱教習強兵負而趨走號為排城戰士在外輜重居中自涇州緣原北上衆軍將出未戰之間有賊數百騎詐持文書云是降簿乞且緩師寶寅延伯謂其事實遂巡未鬪俄而宿勒明達率衆自東北而至乞降之賊從西競下諸軍前後受敵延伯兵力疲怠賊乃乘間得

入排城延伯軍大敗

西魏宇文泰與東魏高歡戰於邙山泰軍不利裨將于謹率其麾下僞降立於路左歡乘勝逐北不以為虞追騎過盡謹乃自後擊之敵人大駭獨孤信又收集兵士於後突擊歡軍亂以此西魏得全而退

唐史思明陷洛陽賊鋒甚盛副元帥李光弼守河陽謂李抱玉曰將軍能為我守南城二日乎抱玉曰過期若何光弼曰過期而救不至任棄城也賊師周摯先攻南城

將陷之抱玉乃紿之曰吾糧盡明日當降賊衆大喜歛軍以候之抱玉因得繕完設備明日堅壁請戰賊怒欺紿急攻之抱玉出奇兵表裏夾攻殺傷甚衆摯軍退光弼自將於中潭城摯捨南城攻中潭不勝乃整軍將攻北城光弼以兵出戰大敗之

宋夏州李繼遷遁在斤澤都巡檢曹光實選精騎襲之繼遷僅以身免獲其母妻於是繼遷復結婚於豪酋轉徙伏匿浸以強盛使人紿光實曰我數奔北勢窘不能

自存矣公許我降乎因陳舅甥之禮期某日於葭蘆州
降光實信之且欲擅其功故不與人謀至期繼遷設伏
止領十數人近城迎光實從百騎赴之繼遷前導北行
至其地忽舉手揮鞭伏兵盡起光實被害

秦末天下兵起沛公西入武關欲以二萬人擊秦峽關
下軍張良曰秦兵尚彊未可輕也臣聞其將屠者子賈
豎易動以利願且留壁使人先行為五萬人具食益張
旗幟諸山之上為疑兵令酈食其持重寶啗秦將秦將

果欲連和俱西襲咸陽沛公欲聽之良曰此獨其將欲
叛士卒恐不從不從必危不如因其懈擊之沛公乃引
兵擊之秦軍大敗

隋末宇文化及弒煬帝後率兵來攻李密於黎陽密知
化及糧且盡偽與和以斃其衆化及弗之悟大喜恣其
兵食冀密饋之會密下有人獲罪亡投化及具以密情
告化及大怒其食又盡乃渡永濟渠與密戰於童山之
下自辰達酉密為流矢所中頓於汲縣化及掠汲郡北

趣魏縣其將王智畧等率部衆歸於密者前後相繼

唐貞元三年吐蕃結贊入寇為李晟邀擊之又襲破其
摧沙堡深恨晟及渾瑊馬燧欲陰計圖之乃卑詞厚禮
告馬燧請重立盟誓則蕃軍引去德宗不許燧自入朝
言之上令崔翰入蕃報結贊言還我鹽夏二州則同盟
結贊曰清水之會同盟人少是以和好輕慢不成今蕃
相及元帥已下凡二十一人赴盟靈州節度杜希全涇
原李觀皆和善守信境外重之此時須令預盟翰約盟

於清水結贊曰清水非吾地請盟於原州土梨樹盟畢則歸二州翰歸備奏其事神策將馬有麟奏曰土梨樹地多險阻恐蕃有軍隱伏不利不如平涼其地坦平且邇涇州為便帝從之詔報以希全只在靈州李觀又已改官今遣侍中渾瑊充盟會使崔漢衡副之鄭叔矩為判官瑊統兵二萬又詔華州節度駱元光以本鎮兵從瑊瑊與結贊初約以兵三千列於壇之東西是時蕃軍精騎數萬列壇西結贊又請瑊以下具衣冠佩劍瑊等

入幕次坦無他慮結賛伐鼓三通其衆呼譟而進城遽
出自幕後偶得他馬跨而奔馳追騎雲合流矢雨集崔
漢衡已下六十餘人皆陷於賊

退

漢劉表遣劉備北侵至鄴曹操遣夏侯惇李典拒之一
朝備燒屯去惇遣諸軍追擊之典曰賊無故退疑必有
伏南道窄狹草木深不可追也不聽惇等果入賊伏裏
戰不利典往救備見救至乃退

魏太和三年孫權揚聲欲向合肥征東將軍滿寵禦之
充豫諸軍皆集權等退詔罷兵寵以為今賊大舉而還
非本意也此必欲偽退以罷吾兵而倒還乘虛掩不備
也表不罷兵後十餘日權果再到合肥城下不克而還
東晉末妖賊孫恩北出海鹽時劉裕拒之築城於海鹽
賊日來攻城城內兵力甚弱裕深慮之乃一夜偃旗匿
衆若已遁者明早開門使羸疾數人登城賊遙問劉裕
所在曰夜已走矣賊信之乃率兵衆大入城裕乘其懈

怠奮擊大破之

後涼呂光遣將呂延伐西秦大破之乞伏乾歸泣歎曰
死中求生正在今日乃縱反間稱乾歸東奔成紀呂延
信之引師輕進司馬耿稚諫曰乾歸雄勇過人權畧難
測破王廣尅楊定皆羸師以誘之雖蕞爾小國不可輕
也因獸猶鬪况乾歸乎今宜布陣而前步騎相接徐候
諸軍大集可一舉滅之延不從而戰敗

北涼主沮渠蒙遜伐西涼李歆於酒泉先攻浩亶蛇盤

於帳前蒙遜笑曰前一為騰蛇今盤在吾帳天意欲吾
回師先定酒泉乃燒攻具而還次於川岵聞歆集兵欲
攻張掖蒙遜曰入吾計矣但恐間吾回軍不敢前也兵
事尚權乃露布西境稱得浩亶將進軍黃谷歆聞而大
悅進入都瀆澗蒙遜潛軍逆之敗歆於懷城遂進尅酒
泉

後魏將慕容白曜南征宋以酈範為副師以無鹽宋將
申纂憑城拒守議者僉以攻具未周不宜便進範曰輕

軍遠襲深入敵境無宜淹留以失機候且纂必以我軍來速不在攻守謂方城可憑弱卒可恃令若外潛威形內整戎旅密勵將士出其不意可以攻而剋之白曜遂潛軍偽退示以不攻纂果不設備於是即夜部分晨便攻城崇朝而克

後魏末幽州刺史劉靈助以莊帝被爾朱兆所弑遂舉兵唱義諸州豪右咸相通結靈助進屯於定州之安國魏遣將叱列延慶討之諸將謂延慶曰靈助善卜筮百

姓信惑所在響應未易可圖若萬一戰有利鈍則大事去矣未若還師西入據關拒險以待其變延慶曰劉靈助庸人也天道深遠豈其所識大兵一臨且彼皆恃其妖術坐看符厭寧肯戮力致死與吾爭勝負哉如吾計者正欲出營城外說言西歸靈助聞之必信而自寬潛軍往襲可一舉而擒乃出頓城西揚聲將還簡精騎一千夜發詰朝造靈助壘戰於北城遂破擒之

西魏末大將軍史寧與突厥木杆可汗同伐吐谷渾遂

至樹敦樹敦耶吐谷渾之舊都多諸珍藏而其主先已奔賀真誠留其征南王及數千人固守寧進攻之偽退吐谷渾人果開門逐之因迴兵奪門門未及闔寧兵遂得入生擒其征南王俘虜男女財寶盡歸諸突厥

西魏宕昌羗獠甘作亂逐其王彌定魏將史寧討破之甘將百騎走投生羗鞏廉王彌定遂得復位寧以未獲獠甘密欲圖之乃揚聲欲還甘聞之復招引叛羗依山起柵欲攻彌定寧謂諸將曰此羗入吾術中當進兵擒

之耳遂進獠甘衆至與戰大破之并獲罕廉王

隋雋州烏蠻反遣周法尚討之軍將至賊棄州城走散
出谷間法尚捕不能得於是遣使慰諭假以官號偽班
師日行二十里軍在舍潛遣人覘之知其首領盡歸柵
聚飲相歡法尚遣步騎數千人襲擊破之

海都犯邊巴延留拒之廷臣有譖巴延久居北邊與海
都通好無尺寸之功者詔以御史大夫伊實特穆爾代
之居巴延於大同以俟後命伊實特穆爾未至三驛會

海都兵復至巴延遣人伊實特穆爾曰公姑止待我翦
此寇而來未晚也巴延與海都交兵且戰且却凡七日
諸將以為怯憤曰果懼戰何不授軍於大夫巴延曰海
都懸軍涉吾地邀之則遁誘其深入一戰可擒也諸將
必欲速戰若失海都誰任其咎諸將曰請任之即還軍
擊敗之海都果脫去乃召伊實特穆爾至軍授以印而
行

詭聲

春秋時華登帥吳師以敗宋師公欲出厨人濮曰吾小人可藉死而不能送亡君請待之乃徇曰楊徽者公徒也衆從之公自揚門見之下而巡之曰國亡君死二三子之恥也豈專孤之罪也齊烏枝鳴曰用少莫如齊致死齊致死莫如去備彼多兵矣請皆用劍從之華氏北復卽之厨人濮以裳裹首而荷以走曰得華登矣遂敗華氏於新里

隋末楊玄感反攻東都刑部尚書衛文升與玄感戰兵

始會玄感詐令人大呼曰官軍已得玄感矣官軍稍怠
玄感與數千騎乘之文升於是大敗

詭形

東漢袁紹將許攸降曹操因說曰袁氏輜重有萬餘騎
屯軍無嚴備今以輕兵襲之不虞而至燭其積聚不過
三日袁氏自敗矣操大喜選銳步騎皆用袁氏旗幟銜
枚縛馬日夜從間道出人抱束薪所歷道有問者應曰
袁公恐曹操掠鈔後軍還兵以益備聞者信以為然皆

自若既至圍屯大放火營中驚亂大破之盡燔其糧穀及寶貨

後周宋楊堅輔政周大將尉遲迥在河北拒命河南州縣多從迥堅遣將于仲文討之迥將檀讓屯成武別將高士儒以萬人屯永昌仲文詐移書州縣曰大軍將至可多積粟讓謂仲文未能卒至方槌牛享士仲文知其急選精騎襲之一日便至遂拔成武迥將席毗羅衆十萬屯於沛縣將攻徐州其妻子在金鄉仲文遣人詐為

毘羅使者謂金鄉城主徐善淨曰檀讓明日午時到金鄉將宣蜀公令即尉遲迥賞賜將士金鄉人謂為信然皆喜仲文簡精兵偽建迥旗幟倍道而進善淨遙見仲文且至以為檀讓乃出迎謁仲文執之遂取金鄉諸將多勸屠之仲文曰此地是毘羅起兵之所當寬其妻子其兵可自歸如即屠之彼望絕矣衆皆稱善於是毘羅恃衆來薄官軍仲文背城結陣出軍數里設伏於麻田中兩陣纔合伏兵俱發曳柴鼓譟塵埃漲天毘羅軍大潰

仲文乘之賊皆投洙水而死水為之不流獲檀讓檻送京師江南悉平與呂蒙襲南郡恤關羽之衆戚屬同

五代梁將戴思遠攻德勝北城莊宗命李嗣源設伏於戚城令騎軍挑戰梁軍大至莊宗率中軍以禦之時李從珂偽為梁幟奔入梁壘斧其望樓持級而還梁軍愈恐步騎漸至李嗣源以鐵騎三千乘之梁軍大敗俘斬二萬計

梁葛從周圍兗州兗人不出從周詐揚言并人鄆人來

救即引兵趨高吳夜半潛却歸砦朱瑾果出兵攻外壕
我軍士突出掩殺千餘人生擒都將孫漢筠

五代漢除趙暉鳳翔節度屬王景崇叛據岐山不受代
朝廷命暉統兵討之時李守正叛於蒲趙思綰據於雍
與景崇迭相為援乃引蜀軍出大散關勢不可遏暉數
戰而勝然後暫而圍之暉屢使人挑戰賊終不出暉乃
潛使千餘人於城南一舍之外擐甲執兵偽為蜀兵旗
幟循南山而下詐令諸軍聲言川軍至矣景崇令數千

人潰圍而出以為應援暉設伏而待一鼓盡殪之自是景崇膽破無復敢出明年春擒之

宋雍熙初張齊賢知代州敵騎自胡谷入寇薄城下神尉都校馬正以所部列南門外衆寡不敵副都署盧漢斌畏懦保壁自固張齊賢選廂軍三千出正之右誓衆感慨一以當百敵遂却走循胡盧河南而西先是約都部署潘美以并師來會戰無何間使為敵所得齊賢以師期既漏且虞美之衆為敵所乘俄而美有使至云師

出并州行四十里至栢井忽得密詔東路王師歟於君子
館有詔并之全軍不得出戰已還州矣于時敵騎塞川
齊賢曰敵知美之來未知美之退乃閉其使密室中夜
發兵二萬人持一幟負一束芻距州城西南三十里列
幟燃芻敵遙見之火光中有旗幟意謂并師至矣駭而
北走齊賢先伏步卒二千於土塏砦掩擊大敗之擒其
北大王之子一人帳前舍利一人斬數百級獲馬千餘
器甲甚衆賢歸功漢斌捷奏至太宗嘉之優詔褒美

死戰

秦末秦軍攻趙兵項羽救之引兵渡河皆沉船破釜甑
燒廬舍持三日糧以示必死無一還心於是至則圍秦
將王離九戰絕其甬道大破之虜王離當是時楚兵冠諸
侯諸侯軍救鉅鹿下者十餘壁皆莫敢縱及楚擊秦諸
將皆從壁上觀楚戰士無不一當十楚兵呼聲動天地
諸侯軍無不人人惴恐

漢韓信擊趙使萬人先行出背水陣趙軍望見大笑平

明信建大將旗鼓鼓行出井陘口趙開壁擊之良久信走水上軍皆殊死戰不可敗遂破趙軍擒趙王歇諸將因問信曰兵法右背山陵前左水澤今者將軍令臣等反背水陣此何術也信曰此在兵法顧諸君不察耳兵法不曰陷之死地而後生置之亡地而後存乎且信非得素拊循士大夫此所謂驅市人而戰也其勢非置死地使人人自為戰即與之生地皆走寧尚得而用之乎諸將皆曰非所及也

宋武帝作相舉兵伐後秦姚泓以王鎮惡為前鋒而鎮惡至潼關請率水軍自河入渭直至渭橋鎮惡所乘皆蒙衝小艦行船者悉在艦內沂渭而進艦外不見行船人北土素無舟楫莫不驚以為神鎮惡既至令將士食畢便棄船登岸渭水流急倏忽間諸艦悉逐流去時泓屯軍在長安城猶數萬人鎮惡撫慰士卒曰卿諸人并家在江南此是長安城北門外去家萬里而舫乘衣糧已遂流去豈復有求生之計耶惟宜死戰可立大功

不然則無遺類耳乃身先士卒衆亦知無復退路莫不
騰勇爭先泓衆一時奔潰即陷長安城

梁將陳慶之守渦陽城與魏將相持自春至冬數百戰
師老氣衰魏之援兵復欲築壘於軍後諸將恐腹背受
敵議退師慶之曰兵來至此涉歷一歲糜費糧仗其數
極多諸軍並無鬪志皆謀退縮豈是欲立功名直聚為
鈔暴耳吾聞致兵死地乃可求生須虜圍合然後與戰
諸將壯其計從之魏人掎角作十三城慶之銜枚夜出

陷其四壘所餘九城兵甲猶盛乃陳其俘馘鼓譟而攻
魏師遂大奔潰斬獲畧盡

唐昭宗時幽州劉仁恭率軍士十萬寇魏州屠其郡梁
將葛從周自邢臺馳入魏州燕軍突之上水關攻館陶
門從周與卒五百騎出戰謂門者曰前有敵不可返顧
命闔其門從周極力死戰大敗燕人

乘勝

晉杜預襲吳樂鄉虜都督孫歡州郡皆望風歸命奉送

印綬時衆軍會議或曰百年之寇未可盡克今向暑水
潦方降疾疫將起宜候來冬更為大舉預曰昔燕樂毅
藉濟西一戰以併強齊今王師兵威已振譬如破竹數
節之後迎刃而解也遂指授郡帥直指秣陵所過城邑
莫不束手遂平吳先議者慙而謝焉

東晉將周訪討賊杜曾曾大潰殺千餘人訪夜追之諸
將請待明訪曰曾驍勇能戰向之敗也彼勞我逸是以
尅之宜及其衰乘之可滅鼓行而進遂以定漢沔

十六國蜀李特攻晉將張徵徵軍潰特議欲釋徵還涪諸將進曰徵軍速戰士卒傷殘智勇俱竭宜因其弊遂擒之若舍而寬之徵養兵收亡餘衆更合圖之未易也特從之復進攻徵潰圍走特遣將水陸追之遂害徵生擒徵子存以徵喪還之

唐武德初劉武周據太原使其將宋金剛屯河東太宗往征金剛遁走太宗追擊大破之乘勝逐北一日一夜行二百里轉戰十合士卒疲弊至高壁嶺總管劉弘基

執馬諫曰猴糧已竭士卒疲頓願且停營待兵糧咸集而後戰太宗曰功者難成而易敗機者難得而易失金剛走到汾州衆心已沮我及其未定當乘其勢擊之此破竹之勢也如是更遲留賊必生計此失機之道也遂策馬去諸軍乃進莫敢以饑乏為辭夜宿於雀鼠谷之兩原太宗不食二日不解甲三日軍中苦饑此夕惟一羊太宗撫將士與之同食三軍感恩皆饑而思奮明日趨汾州金剛列陣南北七里以抗官軍太宗遣總管

李勣等當其北翟長孫等當其南親御大軍以臨之諸軍戰小却為賊所乘太宗率精騎三千直趨金剛賊衆大潰遂破之

太宗破薛仁果將宗羅睺於高撝乘勝率二千餘騎追之竇軌苦諫曰仁果猶據堅城雖破羅睺未可輕進請按兵以俟其變太宗曰慮之久矣破竹之勢不可失也賊大軍已敗餘衆何足為虞克魁之計畫於此矣遂率衆而進至夜半軍臨城守埤者皆亂爭自投而下仁果

窮蹙開門請降諸將奉賀因問曰始大王野戰破其將
其主尚保堅城王無攻具輕騎騰逐不待步兵徑薄城
下咸疑不克而竟下之何也太宗曰此以權道迫之使
其計不暇發以故尅也宗羅睺恃往昔之勝兼復養銳
日久見吾不出意在相輕今喜吾出悉兵來戰雖擊破
之擒殺蓋少若不急躍還走投城仁果收而撫之則便
未可得矣且其兵衆皆隴西人一敗退不及回顧散歸
隴外則折據自虛我軍隨而迫之所以懼而降也此可

謂成算諸君蓋不見耶諸將曰此非凡人所能及也

郭子儀擊賊將李歸仁大破之日暮僕固懷恩謂子儀曰賊必棄城走請以二百騎追之縛取李歸仁安守忠子儀曰將軍戰亦疲矣且休迨明而圖之懷恩曰歸仁守忠天下驍賊也驟勝而敗此天與我也奈何縱之不取若始得衆復為我患雖悔無及夫戰尚速何明日為子儀固止之令還營懷恩固請往而復返一夕而四起遲明諜至守忠等果遁

朱泚之亂賊驍將張庭芝逼柵求戰李晟謂諸將曰吾
恐賊不出今冒死而來天贊我也勸諸將縱兵擊之時
駱元光領華州兵營在北兵少賊併力攻之晟遣李演
孟華以精卒救之中軍鼓譟演力戰大破之殪屍滿地
翌日將復出師諸將請待西軍至則左右夾攻晟曰賊
既傷敗須乘勝撲滅若俟其有備豈王師之利哉晟乃
號令誓師畢陣於光泰門外使王佖李演率騎軍史萬
頃領步卒直抵苑牆先是夜使人開苑牆二百餘步至

是賊已立木柵賊倚柵拒戰晟叱軍士曰安得縱賊如此當先斬公等萬頃懼先登拔柵而入王使騎軍繼進賊奔潰大軍分道並入驅蹙至於白華忽有賊騎千餘出於官軍之背晟以麾下百餘騎馳入左右呼曰相公來賊聞之驚潰官軍追斬不可勝計朱泚姚令言遁走其餘克黨相率來降

魏諸葛誕據壽春反魏將王基討之司馬昭欲遣諸將輕兵深入招遞吳將唐

關

子弟因豐有蕩覆吳之勢

基諫曰昔吳將諸葛恪乘東

關

之勝竭江表兵以圍新

城城既不拔而衆死者大半蜀將姜維因洮上之利輕
軍深入糧餉不繼軍覆上邽夫既勝之後必輕敵則慮
難不深今賊新敗於外又內患未弭是其修政設慮之
時也且兵出踰年人有歸心今俘馘十萬罪人斯得自
歷代征討未有全兵獨克如今之盛者也昔武皇帝破
袁紹於官渡自以所獲已多不復追奔懼挫威也從之
後周武帝伐齊軍次并州齊將安德王延宗擁兵四萬

出城拒帝帝率諸軍合戰齊人退帝乘勝逐北率千餘騎入城東門令諸軍繞城置陣至夜延宗率其衆排車而前城中軍却人相蹂踐大為延宗所敗死傷略盡齊人欲閉門以門下積屍靡不得闔帝從數騎崎嶇危嶮僅乃得出至明率諸軍更戰大破之擒延宗并州平周武窮兵幾於不濟

狄青破儂智高智高兵敗奔邕州其下皆欲窮其窟穴青亦不從以謂趨利乘勢入不測之城非大將事智高

因而獲免天下皆罪青不入邕州脫智高於垂死然青
之用兵主勝而已不求奇功故未常大敗計功最多卒
為名將譬言如奕棋已勝敵可止矣然猶攻擊不已往往
大敗此青之所戒也臨利而能戒乃青之過人處

兩敵

梁司州刺史柳仲禮留其長史馬岫守安陸自率步騎
一萬寇西魏襄陽西魏將楊忠率衆南伐攻梁隨郡克
之進圍安陸仲禮聞隨郡陷恐安陸不守遂馳歸赴援

諸將恐仲禮至則安陸難下請急攻之忠曰攻守殊勢
未可卒拔若引日勞師表裏受敵非計也南人多習水
軍不閑野戰仲禮迴師已在近路吾出其不意以奇兵
襲之彼怠我奮一舉必克則安陸不攻自拔諸城可傳
檄而定也於是選騎二千銜枚夜進遇仲禮於滹忠親
自陷陣擒仲禮悉俘其衆安陸及竟陵郡皆降如忠所
策

唐武德中太宗圍王世充於東都世充勢窮竄建德自

河北來救諸將及蕭瑀等咸請且退師避之太宗不許
曰世充糧盡內外離心我當不勞攻擊坐收其弊耳建
德新破孟海公將驕卒情今我據武牢扼其襟要若賊
恃勝冒險爭鋒吾當破之必矣賊若不戰旬日之間世
充自潰彼敗我振兵足以臨之矣一行兩定在於斯舉
若不速進賊入武牢諸城新附必不能守二賊并力將
若之何秦府記室薛收進曰王充據東都府庫填積所
患者在於乏食是以為我所持建德總十萬餘衆來拒

王師亦當盡彼驍雄期於連戰若聽縱其至此兩寇相連轉河北之積以相資給則伊洛間戰鬪不已大王今欲親率猛銳先據成皋之險訓兵坐甲當彼疲弊之衆一戰必尅建德破則世充自下不過數旬二國之君可面縛麾下蕭瑀等奈何遂請退兵太宗曰善而從之留齊王元吉圍王世充親率三千五百人趨武牢守之不與戰相持二十餘日建德謀伺官軍芻盡牧馬於河北將襲武牢太宗聞之遂牧馬千餘匹於河渚間以誘之詰朝

建德果悉衆而至陣於泥水東太宗候其陣久卒饑令
宇文士及率騎經賊陣之西馳而南上賊陣動因而諸
軍奮擊之大潰竟如太宗本策

退據

隋末唐高祖義師發太原次靈石縣賈胡堡隋將宋老
生率精兵二萬屯霍邑以拒之會久雨糧盡與長史裴
寂及諸將議曰宋老生頓霍邑屈突通鎮河東二人同
心非造次可進欲且還太原以圖後舉太宗曰本興大

義以救蒼生當須先入咸陽號令天下今遇小敵便即班師將恐義徒一朝解體還守太原一城之地此為賊爾何以自全高祖乃止太宗引師赴霍邑遂平老生

武后初徐敬業舉兵於江都稱匡復皇家以塾屋尉魏思溫為謀主問計於思溫對曰明公既以太后幽執少主志在匡復兵貴神速但宜早度淮北親率大衆直入東都山東將士知公有勤王之舉必以死從此則指日刻期天下必定敬業將從其策薛璋又說曰金陵之地

王氣已見宜早應之兼有大江設險足可以自固請且
攻取常潤等州以爲王霸之業然後率兵北上鼓行而
前此則退有所歸進無不利實爲良算也敬業以爲然
乃自率兵四千人南度以擊潤州思溫密謂杜求仁曰
兵勢宜合不可分今敬業不知并力度淮率山東之衆
以取洛陽是必無能成事已可知敬業尋已悔之所以
遂敗

苦戰

春秋時晉師伐齊陣於鞏晉解張御卻克鄭丘緩為右及戰卻克傷於矢流血及屨未絕鼓音曰余病矣張侯曰自始合而矢貫余手及肘余折以御左輪朱殷豈敢言病吾子忍之緩曰自始合苟有險余必下推車子豈識之然子病矣張侯曰師之耳目在吾旗鼓進退從之此車一人殿之可以集事若之何其以病敗君之大事也擐甲執兵固即死也病未及死吾子勉之左并轡右援枹而鼓馬逸不能止師從之齊師敗績逐之三周華

不注

晉劉裕率兵伐後秦姚泓後魏遣將鵞青等步騎十萬屯河北常有數千騎緣河隨晉軍進止時晉軍人緣河南岸牽百丈河流迅急有漂度北岸者輒為魏人所殺掠遣軍繞過岸即退軍還復來裕乃遣白直隊主丁旰率七百人車七百乘於河北岸上去水百餘步為却月陣兩頭抱河車置弓弩畢使立一白旄魏人初不解其意并未動裕先命將朱超石戒嚴二千人白旄既舉超

石馳往赴齋大弩百張一車並二十人設柵排於轅魏人見營陣乃進圍營超石先以軟弓小箭射之魏軍四面俱走攻營於是百弩俱發又遣善射者叢射之魏衆既多弩不能制超石初行別齋大鎚并千餘張稍乃斷稍長三四尺以鎚鎚之一稍輒洞貫三四人魏衆不能當遂奔潰

梁武帝遣曹仲宗等攻魏渦陽又以韋放為明威將軍總兵會之魏大將費穆帥衆掩至放軍營未立麾下止

有二百餘人放從弟洵驍果有勇力單騎擊刺屢折魏
軍洵馬亦被傷不能進放胄又貫三矢衆失色請放突
去放厲聲叱之曰今日惟有死耳乃免胄下馬據胡牀
處分士卒皆殊死戰莫不一當百逐北大破之諸營壘
一時奔潰

敗

晉末河間王顥在關中遣將張方討長沙王乂方率衆
屯河南乂遣左將軍皇甫商拒之而敗張方率兵入洛

陽又奉惠帝討方於城內方軍遙見乘輿於是引退止之
不得衆遂大敗方退壁於十二里橋人情挫衄無復固
志或勸方夜遁方曰兵之利鈍無常貴因敗以為成功
耳我更前作壘出其不意此用兵之奇也乃夜潛進逼
洛陽城七里又又新捷不以為意忽聞方壘成入師乃
出戰遂大敗

東晉將周訪討江沔間賊杜曾訪有衆八千進至沌陽
曾銳氣甚盛訪曰先人有奪人之心善謀也使將軍李

恒督左甄許朝督右甄訪自領中軍高張旗幟曾果先
攻左右甄曾勇冠三軍訪甚惡之自於陣後射雉以安
衆心令小將趙盾領其父餘兵屬左甄力戰敗而復合
盾馳馬告急訪怒叱令更進盾號哭還戰自辰至申兩
甄皆敗訪選精銳八百人自行酒飲之勅不得輕動聞
鼓音乃進賊未至三十步訪親鳴鼓將士皆騰躍奔走
曾遂大潰殺千餘人遂定漢沔

隋末高祖起兵自太原至霍邑隋將宋老生守城太宗

以數騎詣其城下舉鞭指揮若將圍城之狀且詬之老
生怒引兵三萬自東門南門分道而出高祖謂建成曰
汝看兩陣將交引左軍直趨東門命太宗引右軍直趨
南門以斷其歸路老生之軍背城而列陣高祖以中軍
與建成合陣城東太宗陣於城南老生麾兵疾進先薄
高祖而建成墜馬老生乘之中軍與左軍咸却太宗自
南原遙見塵起知義師退率二百騎馳下峻坂殺一賊
將遂衝斷其軍出其陣後表裏齊譟隋師大潰遂擒老

生而平霍邑

隋末稽胡五萬餘人掠宜春竇軌討之與賊相遇賊乘高縱火王師稍却軌斬其部將二十四人拔隊中小帥以代之勒兵復戰軌自率百騎殿於軍後令之曰聞鼓聲不進者自後斬之既而鼓之士卒爭赴敵賊射之不能止因大破之

隋寇厥沙鉢略可汗寇掠而南詔以達奚長儒為行軍總管擊之遇於周槃衆寡不敵軍中大懼長儒慷慨神

色愈烈為虜所衝突散而復聚四面抗拒轉鬪三日晝
夜凡十四戰五兵咸盡士卒以拳毆之手皆見骨殺傷
萬計虜氣稍奪於是解去突厥本欲大掠秦隴既逢長
儒共皆力戰虜意大沮明日於戰處焚屍慟哭而去

後晉開運中契丹擁衆南向約八萬餘騎晉將杜重威
懼退保州契丹踵之晉軍至陽城契丹大至晉軍與戰
逐北十餘里契丹踰白溝而去晉軍結陣而南胡騎四合
如山諸軍力戰拒之是日纔行十餘里人馬饑乏晉軍

至白圍衛村埋鹿角為行寨契丹圍之數重奇兵出寨
後斷糧道是夕東北風大起破屋折樹營中掘井方尺
水輒崩士卒取其泥帛絞而飲之人馬俱渴至曙風尤
甚時晉師居下風將陣弓弩無所施符彥卿曰與其束手
就擒曷若以身徇國乃與張彥澤等引精騎出西門
擊之諸將繼至契丹却數百步彥卿等擁萬餘騎橫擊
契丹呼聲動天地契丹大敗而走勢如崩山李守真亦
令步兵盡拔鹿角出關步騎俱進逐北二十餘里鐵鵝

既下馬蒼皇不能復上皆委棄馬及鎧仗蔽地杜威曰賊已破膽不宜更令成列遣精騎擊之皆沒水去

耿全斌從征太原還遇虜於滿陰追擊至徐河因據水口要害遷補騎副兵馬使又改雲騎軍使屯瀛州與虜戰所乘馬兩中流矢死凡三易乘戰不却賊為引去

宋吳玠守秦隴金烏珠會諸道兵十餘萬造浮梁跨渭自寶鷄結連珠營壘石為城夾澗與官軍相拒攻和尚原玠命諸將選勁弓强弩分番迭射號駐隊矢連發不

絕繁如雨注敵稍却則以奇兵旁擊絕其糧道度其困
且走設伏於神岔以待金兵至伏發衆大亂縱兵夜擊
大敗之烏珠中流矢僅以身免亟剃其鬚髯而遁胡世
將問玠所以制勝者於玠弟璘璘曰璘先從兄有事西
夏每戰不過一進却之頃勝負輒分至金人則更進迭
退忍耐堅久令酷而下必死每戰非累日不決勝不遽
追敗不至亂蓋自昔用兵所未嘗見與之角逐滋久乃
得其情蓋金人弓矢不若中國之勁利中國士卒不及

金人之堅耐吾常以長技洞重甲於數百步外則其衝
突固不能相及於是選擇形便出銳卒更迭撓之與之
為無窮使不得休暇以沮其堅忍之勢至決機於兩陣
之間則璘有不能言者方富平之敗秦鳳皆陷金人一
意睨蜀東南之勢亦急微玠身當其衝無蜀久矣故西
人至今思之

攻必救

春秋時楚子及諸侯圍宋宋公孫固如晉告急先軫曰

報施救患取威定霸於是乎在矣狐偃曰楚始得曹而
新婚於衛若伐曹衛楚必救之則齊宋免矣宋人使門
尹般如晉師告急公曰宋人告急舍之則絕告楚不許
我欲戰矣秦齊未可若之何先軫曰使宋舍我而賂齊
秦藉之告楚我執曹君而分曹衛之田以賜宋人楚愛
曹衛必不許也喜賂怒頑能無戰乎公說執曹伯而分
曹衛之田以畀宋人遂與楚人戰大敗之

掩巢

魏伐趙趙請救於齊田忌引兵救趙孫臏曰夫解雜亂
紛糾者不控捲救鬪者不搏撾批亢擣虛形格勢禁則
自為解耳今魏趙相攻輕兵銳卒必竭於外老弱罷於
內君不若引兵疾走大梁據其街路衝其方虛彼必釋
趙而自救是我一舉解趙之圍而收弊於魏也田忌從
之直走大梁魏師遂退

魏武征河北師次頓丘黑山賊于毒等攻東武陽魏武
引兵入西山攻毒等本屯毒聞之棄東陽還魏武要邀

於內黃大破之

司馬懿征公孫淵淵遣步騎數萬阻遼隧拒懿懿盛兵
南出賊盡赴之乃泛舟潛濟以出其北傍水作長圍忽
棄賊而向襄平諸將言不攻賊而作圍非所以示衆也
懿曰賊堅營高壘欲以老吾兵也攻之正入其計此王
邑所以恥過昆陽也古人言敵雖高壘不得不與我戰
者攻其所必救也賊大衆在此巢窟虛矣我直指襄平
必人懷內懼懼而求戰破之必矣遂整陣而過賊見兵

出其後果邀之懿因謂諸將曰所以不攻其營正欲致此不可失也乃縱兵逆擊大破之三戰皆捷

王莽末光武起兵據昆陽城時唯有八九千人莽遣將王邑嚴尤討之軍到城下者且十萬光武留王鳳等守城與李軼等十餘騎夜出既至鄧定陵悉發諸營兵嚴尤說王邑曰昆陽城小而堅今假號者在宛亟進大兵彼必奔走則昆陽自服邑曰吾昔以虎牙將軍圍翟義坐不生得以見責今將百萬之衆遇城而不能下何謂

耶遂圍之數十里列營百所雲車十餘瞰臨城中旗幟蔽野埃塵連天鉦鼓之聲聞數十里或為地道或衝輞撞城積弩亂發矢下如雨城中負楯而汲王鳳等乞降不許光武遂與諸營部俱進自將步騎千餘前去大軍四五里而陣尋邑亦遣兵數千合戰光武奔之斬首數十級諸部喜曰劉將軍平生見小敵怯今見大敵勇甚可怪也且復居前請助將軍光武復進尋邑兵却諸部兵乘之斬首數百千級連勝遂前因大敗之王邑違尤

攻宛所以敗也

東晉將蘇峻反攻克石頭城據之晉將陶侃溫嶠率兵討之諸將請於查浦築壘監軍鄧岳曰查浦地下又在水南唯白石峻極險固可容數千人賊來攻不便戮賊之術也侃從之夜立壘訖賊見壘大驚賊攻大葉侃將救之長史殷羨曰若大葉步戰不如峻則大事去矣但當急攻石頭峻必救之而大葉自解侃又從羨言峻果棄大葉而救石頭諸軍與峻戰東陵侃督部將斬峻於

陣賊衆遂潰

王世充與李密相持於東都世充夜渡陣於洛水之北其時密已渡洛水陳兵與世充相對東接月城西至石窟密多騎兵長槍宜平寬放縱世充多步兵戈矛排攢宜隘險然南逼洛水北阻太山地形褊促騎不成列世充縱排攢蹙之密軍失利密與數子登船南濟自餘兵馬皆東走月城世充乘勝長驅直至月城下密既渡南岸即策馬西上直向世充本營左右麾旗相繼而至世

充營內見密兵來逼急連舉六烽世充乃捨月城之圍收兵西退自洛北達於黑石中間四十餘里奔赴顛獮大喪師徒密之行也東北之圍不救而自解西南之寇不戰而成功世充伏其權奇不復輕出

太宗討竇建德入武牢進三其營多所傷殺凌敬進說曰宜悉兵濟河攻破懷州河陽使重將居守更率衆鳴鼓建旗踰太行入上黨先聲後實傳檄而定折趣壺口稍駭蒲津收河東之地此策之上也行必有三利一則

入無人之境師有萬全二則拓土得兵三則鄭圍自解
建德將從之而世充之使長孫安世陰齎金玉啗其諸將
以亂其謀衆咸進諫曰凌敬書生耳豈可與言戰乎建
德從之退而謝敬曰今衆心甚銳此天贊我耳因此決
戰必將大捷已依衆議不得從公言也敬固爭建德怒
扶出於是悉衆進逼武牢官軍按甲挫其銳建德中槍
竄於牛渚口唐軍生獲之

光武東圍鉅鹿王郎守將王饒堅守月餘不下連攻不

克耿純曰久守鉅鹿士卒疲敝不如及大兵精銳進攻邯鄲若王郎已誅鉅鹿不戰自服矣從之乃留軍守鉅鹿進軍邯鄲連戰破之郎少傅李立開門納漢兵遂拔邯鄲

後漢將軍耿秉與竇固合兵一萬四千騎擊車師有後王前王前王即後王之子其庭相去五百餘里秉議先赴後王以為併力取根本則前王自服固計未決秉奮身上馬衆軍不得已遂進并縱兵抄掠斬首數千級牛

馬羊十餘萬頭後王安得震怖將數百騎出迎秉降

袁紹曹操相持於官渡沮授說紹遣騎將別為支軍於外以絕曹操之援紹不從許攸進曰曹操兵少而悉師拒我許下餘守勢必空弱若分遣輕軍星夜襲許操為我擒如其未潰可令首尾奔命破之必也紹又不用竟為曹操所敗

魏文帝問司馬懿曰吳蜀宜討何者為先對曰吳以中國不習水戰故散居東關且攻敵扼其喉搯其心夏口

東關賊之心喉若為陸軍以向皖城引權軍東下為水
軍向夏口乘其虛而擊之此神兵從天而下破之必矣
東魏大將高歡率兵伐西魏濟河集諸將議進趣之計
斛律羗舉曰宇文黑獺雖聚凶黨彊弱可知今固守無
糧援可恃有同困獸若不與其戰而徑趣長安長安空
虛可不戰而剋拔其根本彼無所歸則黑獺之首懸於
軍門矣諸將議有異同遂戰於渭曲大敗而歸

隋趙琨於江南岸置安蜀城以禦陳屬霖雨數旬城頽

者百餘步蠻酋鄭南鄉叛引陳將吳明徹欲掩安蜀議者皆勸照益修守禦照不從乃遣使說誘江外生蠻向武陽令乘虛掩襲南鄉所居獲其父母妻子南鄉聞之其黨各散陳兵亦遁

秦末沛公略南陽郡守宋齟走俱城守宛沛公引兵過而西張良諫曰沛公雖欲急入關秦兵尚衆拒險今不下宛宛從後擊強秦在前此危道也於是沛公乃夜引軍從他道還更旗幟黎明圍宛城三匝南陽守欲自剄

其舍人陳恢曰死未晚也乃踰城見沛公曰臣聞足下約先入咸陽者王之今足下留守宛宛大都也連城數十人民衆積蓄多吏人自以為降必死故皆堅守乘城今足下盡日止攻士死傷者必多引兵去宛必隨足下後足下前則失咸陽之約後又有強宛之患為足下計莫若約降封其守因使止守引其甲卒與之西諸城未下者聞聲爭開門而待足下矣沛公曰善乃以宛守為殷侯封陳恢千戶引兵而西無不下者

蕭齊末梁武帝自襄陽率兵東下至郢州攻未拔蕭顗
胄在江陵遣衛尉席闡文勞軍因謂梁武曰今頓兵兩
岸不併軍圍郢定西陽武昌取江州此機已失莫若請
救於魏與北連和猶為上策梁武謂闡文曰漢口路通
荆雍控引秦梁糧道資儲聽此氣息兵若前進魯山必
阻汚路所謂扼喉若糧儲不通自然離散何謂持久鄧
元起近欲以三千兵往定潯陽彼若懽然悟機一郾生
亦足脫拒我師固非三千能下西陽武昌取便得耳得

便應鎮守守兩城不戒萬人糧儲稱是卒無所出東君
有上者萬人攻一城兩城勢不能相救若我分軍應援
則首尾俱弱如其不遣孤城必陷一城既沒諸城相次
土崩天下大事於是去矣若郢州既拔席卷公流西陽
武昌自然風靡何遽分兵散衆自貽其憂且丈夫舉動
欲清天步况擁七州之兵以誅羣豎懸河注火奚有不
滅豈有北面請救以自示弱彼未必能信徒貽我醜聲
此之下計何謂上策及拔郢域向下城戍無不風靡遂

尅建業

武德中李靖隨河間王孝恭討輔公柝公柝遣將馮惠亮率舟師三萬屯當塗陳正通領步騎二萬屯青林山仍於梁山連鐵鑠以斷江路築却月城延袤十餘里與惠亮為犄角之勢孝恭集諸將議皆云惠亮正通并握強兵不戰之計城柵既固卒不可攻請直指丹陽掩其巢穴丹陽既破惠亮自降孝恭欲從其議靖曰公柝精銳既在水陸二軍然其自統之兵亦皆勁勇惠亮等城

柵尚不可攻公柘既保石頭豈應易拔若我師至丹陽
留停旬月進則公柘未平退則惠亮為患此便腹背受
敵恐非萬全之計惠亮正通皆是百戰餘賊必不憚於
野戰止為公柘立計令其持重但欲不戰以老我師今
若攻其城柵乃是出其不意滅賊之機惟在此舉孝恭
然之靖乃先擊惠亮苦戰破之殺傷及溺死者萬餘人
惠亮奔走靖率輕騎先至丹陽公柘大懼先遣偽將左
遊仙領兵守會稽以為聲援公柘擁兵東走以趨遊仙

至吳郡與惠亮正通并相次擒獲江南悉平

後周時詔發關中兵以韋孝寬為元帥東討尉遲迥軍
次河陽迥所置儀同薛公禮等圍偃懷州遣兵擊破之
進次懷縣永橋城之東南其城既在要衝雉堞牢固迥
已遣兵據之諸將士以此城當路請先攻取孝寬曰城
小而固若攻而不拔損我兵威今破其大軍此亦何能
為也於是引軍次於武陟因大破迥子惇惇輕騎走鄴
迥自出戰又破之迥窮迫自殺

唐武德初宇文化及據聊城淮安王神通進兵躡之秘書丞魏徵謂神通曰化及據聊城莘人爲其固守若至莘即宜攻取但拔莘縣聊城益懼因而逼之易同俯拾須以攻具自隨一足威敵二不乏用不然兵至莘城見無攻具不下如不能尅莘而遠追化及恐亦無功則化及非旬月可獲莘人阻我糧運化及爲之外援恐非計之善者神通不從軍次莘果不下而退散

堅壁

春秋時秦為令狐之役故秦伯伐晉晉趙盾禦之以從秦師於河曲史駢曰秦不能久請深壘固軍以待之從之秦人欲戰秦伯謂士會曰若何而戰對曰趙氏新出其屬曰史駢必實為此謀將以老我師也趙有側室曰穿晉君之壻也有寵而弱不在軍事好勇而狂且惡史駢之佐上軍也若使輕者肆焉其可乃皆出戰交綏而退

蜀大將諸葛亮悉大衆十萬由斜谷出始平據武功五

丈原魏將司馬懿帥師拒之與亮對於渭南懿固壘不戰亮分兵屯田為久駐之基屢使交書及致巾幘以怒懿懿亦屢表請戰魏使衛尉辛毗杖節制之諸將皆曰賊不復出矣亮曰彼本無戰心所以固請者示武於衆耳將在軍君命有所不受苟能制吾豈千里請戰耶懿使二千餘人就營東南角大聲稱萬歲亮使問之答曰吳朝有使至請降亮謂曰計吳朝必無降法卿是六十老翁何煩詭誕如此懿與亮相持百餘日亮卒於軍中

及軍退懿乃行營壘曰天下奇才也

摧標

秦姚萇與苻登相持未解登將魏揭飛率氐胡數萬人
攻杏城雷惡地應之攻李潤萇議將討之羣臣咸曰陞
下不憂六十里苻登乃憂六百里揭飛萇曰登非可卒
殄吾城亦非登所能卒圖惡地多智非常人也南引揭
飛東結董成甘言美說以成姦謀若得杏城李潤惡地
據之控制遠近相為羽翼長安東北非復吾有於是潛


軍赴之。甚時衆不滿二千。揭飛惡地衆至數萬。氏胡赴之首尾不絕。甚每一見軍至。輒有喜色。羣下怪而問之。曰。今同惡相濟。皆來會集。吾得乘勢席卷一舉而覆其巢穴。東北無復餘也。揭飛等以甚兵少。盡衆來攻。甚固壘不戰。示之以弱。潛遣子崇率騎數百出其不意。以乘其後。揭飛兵擾亂。甚遣步騎擊之。揭飛衆大潰。斬揭飛。惡地請降。

東魏丞相高歡自將率兵伐西魏。屯軍蒲坂。造三道浮

橋渡河又遣其將竇泰趨潼關高敖曹圍洛州西魏將
宇文泰出軍廣陽召諸將謂曰賊今圍吾三面又造橋
於河示欲必渡欲綴吾軍使竇泰得西入耳久與相持
其計得行非良策也且高歡用兵常以泰為先驅其下
多銳卒屢勝而驕今出不意襲之必克克泰則歡不戰
而自走矣諸將咸曰賊今再近捨而遠襲事若差跌悔
將何及也泰曰歡前在襲潼關吾軍不過霸上今者大
來兵未出郊賊顧謂吾但自守耳無遠鬪意又怛於得

志有輕我心乘此擊之何往不尅賊雖造橋未能徑至
此五日中吾取寶泰必矣幸公等勿疑泰遂率騎六千
還長安聲言欲往隴右既而潛軍東出晨興至小關寶
泰卒聞軍至惶懼依山為陣未及成列泰乃縱兵擊破
之斬泰傳首長安高敖曹適陷洛州聞泰死焚輜重棄
城走歡亦撤橋而退宇文泰初與諸將謀咸難之泰乃
隱其事佯若未有謀者而獨問策於尚書直事郎中宇
文深對曰寶泰歡之驍將也亟勝而輕敵今者大軍若

就蒲坂則高歡拒守竇泰援之内外受敵取敗之道也
不如選輕銳之卒潛出小關泰性躁急必來決戰高歡
持重未即救之則竇泰可擒也既擒竇泰歡勢自沮迴
軍禦之可以制勝泰喜曰是吾心也君即吾之陳平也



武編後集卷四